

Entrante 1 di januari 2026,

Jair Tromp ta asumi rol di comandante di Departamento di Brandweer Aruba

Durante un conferencia di prensa recién Minister di Husticia, Integracion y Transporte Publico, Arthur Dowers (AVP), a informa cu Departamento di Brandweer lo conoce un comandante nobo entrante 1 di januari 2026.

Minister Dowers a splica cu den ultimo añanan Departamento di Brandweer di pais Aruba a pasa den basta turbulencia y na e momento aki gobierno ta purbando di yega na un funcionamiento regular atrobe di Departamento di Brandweer. Den e proceso aki a logra di atrae un comandante nobo pa Brandweer.

No ta un secreto cu basta aña Departamento di Brandweer no tin un comandante



di Brandweer despues cu a schors e comandante cu tabat'ey. Esaki, el a señala, a pone cu e funcionamiento di e organisacion no tabata optimal

Den transcurso di añanan a bin cu personanan di afo cu cierto experticio, pero el a indica, cu e personanan aki no necesariamente tabata den posicion pa eherce e rol di

comandante y asina dirigi e organisacion manera cu mester.

Minister Dowers a splica cu Gobierno di Aruba a papia cu Sr. Jair Tromp, un persona conoci den comunidad y un ciudadano di Aruba cu den pasado ya a traha na Departamento di Brandweer. Tromp a bay traha na Boneiro pa islanan BES na un dado momento y ultimo e tabata traha



na Corsou. Gobierno tabata den conversacion cune algun siman caba y a yega na un acuerdo cu e lo asumi e responsabilidad di

comandante di Departamento di Brandweer na Aruba entrante 1 di januari 2026.

Video di turista ta core riba santo blanco cu UTV ta causa indignacion

Ayera riba rednan social publicacion di un video den cual por mira turistanan den un vehiculo UTV ta core riba santo blanco a causa controversia. Ciudadananon local, como turistanan a reacciona cuestionando con esaki por ta posibel y si e compania cu ta huur e tipo di vehiculonan aki ta informa e turistanan unda mag y unda no mag core cu e tipo di vehiculonan aki.

Un usuario a publica e video riba un pagina di Facebook dedica specialmente na turistanan cu ta busca y comparti informacion di Aruba. Den e video por wak claramente con e turistanan aki ta core cu e vehiculo UTV riba santo blanco, na canto di lama.

Manera ta conoci ley ta prohibi pa vehiculonan di motor core riba santo blanco y den caso cu haci esaki toch, e persona por ricibi un boet significativo.

Mesora usarionan a expresa nan opinion den e seccion di comentarionan.

“Check cual compania di huur auto y yama polis” ; “Semper bo tin un di e cabesnan bashi ey” ; “Sentido comun mester bisa bo cu e no ta permiti,” ; “Wak e cosnan aki nan no ta wak. Mes-



ter coy e number y laga polis duna boet,” ta algun di e comentarionan cu usarionan a publica expresando nan disgusto grandi.

Urarionan ta cuestiona si e doñonan di compania di huur vehiculo ta informa e turistanan na momento cu nan huur e tipo di vehiculonan aki unda ta permiti pa core. Doño di un compania di huur auto a expresa su punto di bista basa riba experiencia cu turistanan.

“Como doño di un compania di huur mi por bisa cu nos ta haci e sinembargo, e actitud di hopi di nos bishitantenan no ta grandi. Bisa nan pa no

hiba un Harley-Davidson bay Natural Bridge y probablemente bo por adivina unda nan ta bay prome,” el a indica.

E discusion riba vehiculonan ATV y UTV ta persisti pa años na Aruba. Ambientalistanan ta bati alarma tocante e daño cu e vehiculonan aki ta causa na naturalesa. Entre otro door di directamente trapa riba animal y mata, pero tambe door di perturba e suelo natural causando entre otro, erosion.

Na 2021, e gobierno anterior di MEP-RAIZ a indica cu a institui un comision multidisciplinario y un taskforce pa atende cu e problema di



UTV/ATV. Na juli 2022, a señala cu a cuminsa cu trabao pa aborda maneho di UTV/ATV, cuminsando cu rutan alternativa pa proteccion di nos naturalesa. Na 2024, a anuncia un proceso di transicion cu lo mester a dura tres aña.

E fase transitorio lo mester a cuminsa 1 di januari 2025 y lo mester termina na 2028, den cual e vision ta cu den 2028 tur compania a cambia nan actividad pa uno cu ta den harmonia cu naturalesa. Entrante 1 di januari 2025, lo mester a apunta tres ruta alternativo, regula desorden y velocidad, y alabes crea espacio di regeneracion di ar-

ebnan di naturalesa afecta (natuurgebieden y natuur en landschap). Pa 2026 lo mester pone fondonan disponibel pa “micro transition loans”, unda companianan chikito por aplica pa yuda cu e transicion pa un otro negoshi. Pa sigui incentiva e transicion di e sector gobierno anterior a plania traha cu programanan di certificacion den cual ta reconoce companianan cu a demostra boluntad y curashi pa cuida naturalesa y alabes stimula actividadnan diferente.

Pero desde e tempo ey, no a tende mas for di gobierno tocante e proceso y kico tur realmente a ser logra.